

Morning Regional Dogri News Bulletin, 25th June 2024

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. 18मीं लोकसभा दे अज्ज दुए रोज बी नमें चुनोए दे सांसदें गी सगंध चकाने दा कम्म जारी रौहग।
2. सिंधुजल समझौते तैहत पनबिजली परियोजनाएं दे निरीक्षण लेई भारत ते पाकिस्तान दियां टीमां किशतवाड़ च मजूद न।
3. मुख् सचिव अटल डुल्लू होरें बर्फ दे लहासे कन्नै पहाड़े पर बनने आलिएं झीलें दे फट्टने करी होने आले नुक्सान कोला बचाह लेई उपाए दी नजरसानी करने पर जोर दित्ता।
4. आईसीसी टी-20 क्रिकेट च भारत नै आस्ट्रेलिया गी 24 रंज कन्नै हराइयै प्रतियोगिता दे सैमीफाइनल च प्रवेश करी लैता ऐ।

<><><><><><>

Oath 2nd Day

संसद दे नमें चुनोए दे मिंबरें दा सगंध चुक्कने दा कार्यक्रम अज्ज बी जारी रौहग। कल 18मीं लोकसभा दे पैहले ध्याड़े प्रधानमंत्री नरेन्द्र मोदी ते उंदे मंत्रिमंडल दे मिंबरें जिस च राजनाथ सिंह ते अमित शाह होरें बी शामिल न, होरें नमीं चुनोई दी लोकसभा दे मिंबरें दे तौरा पर सगंध चुक्की।

<><><><><><>

Jatinder-Jugal Oath

उधमपुर ते जम्मू पार्लिमानी हल्के थमां नमें चुनाए दे बीजेपी सांसद डॉ. जितेन्द्र सिंह ते जुगल किशोर शर्मा होरें कल 18मीं लोकसभा दे मिंबरें दे तौरा पर डोगरी भाषा च सगंध चुक्की। उआं संसद दा पैहला सत्र कल शुरू होआ ऐ।

<><><><><><>

Indus Water Treaty

अधिकारिणं दस्सेआ जे सिंधुजल समझौते तैहत्त भारत ते पाकिस्तान थमां इक प्रतिनिधिमंडल ते निरपक्ख विशेषज्ञं किशतवाड दा दौरा लाया ते दकं बिजली परियोजनाएं दा जायजा शुरू कीता। किशतवाड कैलाश नाथ हुदी रिपोर्ट मूजब दफा 370 हटने दे बाद कुसै पाकिस्तानी प्रतिनिधिमंडल दा जम्मू कश्मीर दा एह पैहला दौरा ऐ। अधिकारिणं दस्सेआ जे प्रतिनिधिणं एनएचपीसी मुख्यालय दा दौरा लाया ते कन्नै गै डैम लेई ड्रबशाला स्थित 85 एमडब्ल्यू रतले पनबिजली परियोजना आली थाहर दा बी जायजा लैता। प्रतिनिधिमंडल मारूसुदर नदी उपपर पकलदुल पनबिजली परियोजना दा बी जायजा लैने लेई दौरा लाग। तोआई जम्मू कश्मीर प्रशासन नै इनें प्रतिनिधिमंडल ते निरपक्ख विशेषज्ञं कन्नै तालमेल लेई 25 तालमेल सरबंधी अफसर नियुक्त कीते न।

<><><><><><>

J&K Railway

जम्मू कश्मीर प्रशासन दे गृह विभाग नै जम्मू कश्मीर च रेलवे दे नमें प्रशासनिक इकाइयां खडेरियां न ते रेल ट्रैक ारबंधी अधिकार क्षेत्र दे सब्बै जीआरपी इकाइए गी अधिसूचित कीता गेआ ऐ। इस गैह दा मकसद केन्द्र शासत प्रदेश च रेलवे दी सुरक्षा गी मजबूत करना की जे औने आले दिनें च जम्मू रियासी ते बारामुला ते श्रीनगर खित्ते बश्कार रेल सेवा दा विस्तार होग ते रेल सेवा कश्मीर ते इस ब'रे दे खीरे तोड़ी बाकी दे मुल्खा कन्नै संपर्क शुरू होग।

<><><><><><>

Bani Tunnel

बनी-बसोहली जिले दे लोक जिला कटुआ दे बसोहली-बनी-सरथल इलाके गी लखनपुर थमां भद्रवाह तोड़ी जोड़ने आले 4 ज्हार करोड़ रपे दी लागता आले शिडक ते टनल परियोजना दी हाल दी घोषणा लेई मते खुश न। कटुआ थमां आकाशवाणी संवाददाता दी रिपोर्ट मूजब लखनपुर थमां भद्रवाह तोड़ी भारत माला राष्ट्रीय जरनैली शिडक दे निर्माण दे बाद खुश न7 ते छत्तरगल्ला टनल दे निर्माण कन्नै इलाके दी मकामी अर्थबवस्था गी बढ़ावा थहोग ते रोजगार दे मौके बी उपलब्ध होंगन। लोकें प्रधानमंत्री नरेन्द्र मोदी, केन्द्री मंत्री नितिन गडकरी ते केन्द्री मंत्री डॉ. जितेन्द्र सिंह हुंदा नमीं सरकार दे बनने दे बाद इस परियोजना दी मंजूरी लेई उंदा आभार प्रगट कीता। आकाशवाणी संवाददाता कन्नै गल्ल करे होई डीडीसी अध्यक्ष कर्नल मोहन सिंह ते इक मकामी शैहरदार गोपाल कुमार होरें आखेआ.....बाईट

<><><><><><>

IB Chief Extension

इंटीलीजेंस ब्यूरो प्रमुख तपन कुमार देका हुंदा अगले ब'रे जून तोड़ी इक ब'रे लेई कार्यकाल बधाई दित्ता ऐ। मंत्रिमंडल दे नियुक्ति सरबंधी कमेटी नै श्री देका हुंदा इंटीलीजेंस ब्यूरो दे निदेशक दे तौरा पर कार्यकाल बधाने दी मंजूरी दित्ती। ओह 1988 बैच दे हिमाचल प्रदेश कैडर दे अफसर न। एह्दे अलावा राष्ट्रीय मानव अधिकार आयोग दे सैक्रेटरी जनरल दे तौरा पर भारत लाल हुंदा कार्यकाल बी इस ब'रे दी 30 जून थमां इक ब'रे लेई बधाई दित्ता ऐ।

<><><><><><>

Poonch LOC

फौज नै कल पुंछ जिले च नियंत्रण रेखा कश शकक शुबे आले हालात च इद्दर-उद्दर चक्कर ला'रदे इक आदमी गी हिरासतै च लेई लैता ऐ। अधिकारिणं जानकारी मूजब खाकी पैंट ते फौजी वर्दी आंगर दी कमीज ते पैरें चपलियां लाए दे इस आदमी गी जिले दे मनकोट सेक्टर च दबराज टॉप इलाके थमां फगड़ेआ गेआ ऐ। दिक्खने ते गल्लबात च एह् आदमी सिद्दड़ जां दमाकी नुक्स आला सेई होंदा ऐ। उआं ओपचारिक पुच्छ गिच्छ लेई फौज नै इसी मेंढर पुलस थाने दे हवाले करी दित्ता।

<><><><><><>

ते हुन बाकि दिणं खबरें कन्नै जगमोहन शर्मा।

<><><><><><>

Chief Secretary

मुख्य सचिव अटल डुल्लू होरें जम्मू कश्मीर च बर्फ दे बड्डे-बड्डे ल्हासे दे पिगलने कन्नै पहाड़े पर बनने आलिणं झीलें दे त्रुट्टने करी चानचक्क औने आले हाडेंदी रोकथाम ते इंदे कोला बचाह आले उपाए दी नजर सानी ते इनेंगी होर निग्गर बनाने दी जरूरतै पर जोर भरेआ ऐ। इस चाल्ली दे हाडें गी ग्लेशिअल लेक आउट बस्ट फ्लड यानि जीएलओएफ आखेआ जंदा ऐ। सरबंधत बक्ख-बक्ख घड़े कन्नै इस ब'रे दी लग्गी दी बैठक दी अध्यक्षता करदे होई अटल डुल्लू होरें आपदा प्रबंधन मैहकमे गी आखेआ जे इत्त भेठा कारवाई करने लेई माहिरें दी इक टीम बनाई जा जिंदे च ग्लेशियर यानि बर्फू दे ल्हासे दा अध्ययन करने आले ते होर दुए जानकार लोक बी शामिल होग तां जे इस चाल्ली दे हाडें ते इंदे कारण होने आले नुक्सान कोला बचेआ जाई सकै। मीटिंगा च होरने दे इलावा गृह विभाग दे प्रधान सचिव, सडके इमारतें सरबंधी मैहकमे दे सचिव ते सरबंधत होरने केई मैहकमे दे आला अफसर बी मजूद हे।

<><><><><><>

JKSSB-ED

अधिकारिक सूत्रें दस्सेआ ऐ जे ईडी नै सोमवार गी 2022 ब'रे दे जेकेएसएसबी दे सब-इंस्पैक्टर भर्ती मतेयान पेपर लीक मामले दे कथित साजश करता ते पैहे डे गैर कनूनी लैन-दे नदी जांच दे इक हिस्से दे तौरा पर गिरफ्तार करी लैता ऐ। रिपोर्टें मूजब संदिग्ध बचौलिया यतीन यादव गी जम्मू च पीएमएलए कनून तैहत गिरफ्तार करी लैता। एह भर्ती मतेयान 27 मार्च 2022 गी होआ हा। सीबीआई दी एफआइआर ते अरोप पत्र थमां एह मामला ईडी अगगे आया। एहदे कोला पैहले ईडी नै मामले दे इक हिस्से दे तौरा पर यादव दे बैंक खाते, न्यू ग्लोबल फ्यूमीगेशन कारपोरेशन नां दी इक कंपनी ते कोई 1 करोड़ रपे दी कीमता दा किश समेयान गी कुर्क कीता ऐ।

<><><><><><>

CBI-NEET

नीट-यूजी मतेयान च कथित अनियमितताएं दी जांच लेई बिहार, गुजरात ते राजस्थान थमां सीबीआई नै 5 मामले हत्थें च लैते न। अधिकारिणें मूजब सीबीआई नै गुजरात ते बिहार थमां इक-इक मामला ते राजस्थान थमां 3 मामले परतियै दर्ज कीते न।

<><><><><><>

Doda PMAY(byte)

प्रधानमंत्री आवास योजना जेहड़ी जे केन्द्र आस्सेआ प्रयोजित बेघर लोकें गी सिरै पर दत्त मुहैया कराने आली स्कीम ऐ, ओहदा लाह डोडा जिले च बी लोडमंद लोकें गी पजाया जा करदा ऐ। जिला विकास कमीशनर हरविंद सिंह होरें इस बारे जानकारी दिंदे होई दस्सेआ जे 18 जहार 296 लोकें गी मकान बनाइयै देने दे लक्ष्य चा 13 जहार कोला मते गी पक्का मकान बनाइयै देई दित्ता गोआ ऐ ते बाकी रौहदे लाभार्थिणें गी बी चालू माली ब'रे दे खीरै तोड़ी अपना पक्का मकान थोई जाग। जिला विकास कमीशनर होरें आकाशवाणी कन्नै गल्ल करदे होई आखेआ.....बाईट

साढ़े जिला संवाददाता नै किश लाभार्थिणें कन्नै बी गल्ल कीती.....बाईट

<><><><><><>

Samba Flag(byte)

रोटरी क्लब सांबा सेंट्रल पास्सेआ कल सांबा दे प्राचीन किले च 100 फुट उच्चा तरंगा झंडा लाया गेआ जेहदा उदघाटन जिला विकास कमीशनर अभिषेक शर्मा होरें कीता। इस मौके पर एसएसपी सांबा विनय शर्मा, रोटरी क्लब दे मिंबर, सांबा दे सिविल समाज दे रसूखदार शैहरी बी मजुद हे, जिंदे च पद्मश्री मोहन सिंह, डोगरी भाषा दे नामवर कवि बिशन सिंह दर्दी ते केई सांबा फौजी बी मजुद हे। इस मौके रोटरी क्लब सेंट्रल दे अध्यक्ष देव चौधरी होरें आखेआ जे एह इक ऐतिहासक पल ऐ जेहड़ा सादिएं ओने आलिएं पीदिएं गी सदा प्रेरत करदा रौहग.....बाईट

<><><><><><>

Udhampur Amarnath

ओंदी श्री अमरनाथ जी दी यात्रा लेई तैआरिएं दे सिलसिले च कल उधमपुर दिऐं जिला विकास कमीशनर सलोनी राय होरें जखैनी थाहर राष्ट्रीय जरनैली शिड़कै कोला लेइयै चनैनी तोडी यात्रा दरान गडिडएं दी बवस्था आले ढंगै सिर आओजाई गी जकीनी बनाने लेई कीते जा'रदे प्रबंधें दा निरीक्षण कीता। डीसी होरें राष्ट्रीय जरनैली शिड़क प्राधिकरण एनएचएआई दे प्रोजेक्ट डरैक्टर गी निर्देश दित्ता जे सब्बने चौकें ते सड़कें गी सजाने सोआरने दा कम्म 29 जून कोला पैहले पैहले मुकम्मल करी लैता जा। एहदे अलावा सरबंधत होरने अजेंसिएं गी बी निर्देश दित्ते गे जे ओ उनें सब्बने थाहरें जित्थें ल्हास पस्सियां पौने दी शैंका मती बनी दी रौहदी ऐ, उत्थें मशीन ते अमले गी सुददी गिनतरी च तैनात रखेआ जा, तां जे पस्सी—कुप्पड़ पौने दी सूरतै च तुरत मलबा हटाइयै रस्ता साफ करी दित्ता जा तां जे यात्रा दरान उत्थें गडिडएं दा जाम नेई लग्गै। इस मौके उधमपुर दे एसएसपी जोगिन्दर सिंह, एडीसी जोगिंदर सिंह जस्रोटिया, एआरटीओ जुगल शर्मा ते सरबंधत होर दुए मैहकमे दे अफसर बी मजुद हे।

<><><><><><>

T-20 World Cup

आईसीसी टी-20 विश्व कप दे इक सुपर-8 मकाबले च कल संजा सेंट लूसिया च भारत नै आस्ट्रेलिया गी 24 रंज कन्नै हराइयै प्रतियोगिता दे सैमीफाइनल च प्रवेश करी लैता ऐ। आस्ट्रेलिया नै टॉस जित्तियै भारत गी पैहले बल्लेबाजी करने लेई आखेआ। भारत नै 20एं ओवरें च 5एं विकटें दे नुकसान पर 205 रंज बनाए। जित्त लेई लोडचदे 206 रंज दे लक्ष्य दा पिच्छा करदे होई आस्ट्रेलिया पूरे 20 ओवर खेडिडयै बी 7एं विकटें दे नुकसान पर 181 रंज गै बनाई सकी। भारतीय कप्तान रोहित शर्मा जिन्नै 41 गेंदें च 92 रंज बनाए, गी प्लेयर ऑफ द मैच घोषत कीता गेआ। आस्ट्रेलिया दी तरफा ट्रैविस नै 43 गेंदें च 76 रंज दा योगदान दित्ता। भारत दा अगला मकाबला वीरवारें मजुदा चैंपियनप इंग्लैंड कन्नै होग। तोआई दक्खन अफ्रीका बी पैहले गै सैमीफाइनल पुज्जी गेदा ऐ।



NEET-Omar

नैशनल कांफ्रेंस दे लीडर उमर अब्दुल्ला होरें आखेआ ऐ जे संसद दे इजलास दे पैहले ध्याड़े विरोधी दलें दी नुख्ताचीनी करने दे बजाए प्रधानमंत्री नरेन्द्र मोदी होरें गी नीट पेपर लीक आले मामले पर बोलना लोड़चदा हा। अपनी इक सोशल मीडिया पोस्ट च साबका केन्द्री मंत्री होरें आखेआ जे प्रधानमंत्री होरें गी एह गल्ल जचनी ही जेकर ओ देश दे नोजवान बच्चे-बच्चिएं दे होरने च बोलदे, नीट आले मामले च कोई भरोसा दोआंदे जिसी लेइयै लक्खां बच्चें अज्ज परेशान न। उमर अब्दुल्ला होर कल 18मीं लोकसभा दे पैहले इजलास दे पैहले ध्याड़े प्रधानमंत्री हुंदे ब्यान पर अपनी प्रतिक्रिया देआ'रदे हे। तोआई पीडीपी प्रमुख ते सांबा मुख्मन्त्री महबूबा मुफ्ती होरें बी मेद प्रगट कीती ऐ जे सब्बने पार्टिएं दे सांसद गुठबाजी कोला उप्पर उठियै नीट पेपर लीक मामले गी संसद च पुट्टगंन।

